



08.05.2023

UPA23/170-2

Imm 170-ip aappassaaneerreqarnerani Siumumiit oqaaseqaat:

Siullermik oqaatigerusuppara Piniarneq Aallaaniarnerlu pillugu inuiaqatigiit ataatsimut eqqarsaatigalugit, qulequtaq pineqartillugu qanoq inuiaqatigiinni pingaaruteqartiginera ilisimaarilluaratsigu, taamaattumillu inatsisip allanngortinneqarnissaanik pisariaqartitsilerneq tunngaviatigut paasisinnaalluaratsigu. Isumarput malillugu inatsit 1999-meersoq tunngavimmigut atuuffimmini siammasissumik atuussimasoq soorunami atuuffimmini pissutsit allanngoriartorfiini allatuulli naleqqussartariaqalersimasoq ilisimagatsigu.

Inatsisissap siullermeernerani oqaaseqaaterput innersuupparput taannalu tingulaariffigeqqaalaassuara.

Oqaaseqaammi tunngaviatigut naleqartitangut arlaqarput, taakkulu ilaat qulequtanngorlugit taakkartulaassuakka, innersuutissallugulu siullermeerinermi oqaaseqaaterput nittartakkami atuarneqarsinnaammat.

- **Piniakkanik pisasiinermi Biologit Piniartullu ilisimasaasa naligiissumik atorneqartarnissat**
- **Piniarsinnaanermut allagartaqalernissamik 15-inik ukioqarnissamik piumasaaqaataasoq**
- **Piniarsinnaanermut allagartamik avataaneersut eqqarsaatigalugit ukiunut marlunnut atuuttoq, sivitsorlugu ukiut pingasunngortinneqassasoq**
- **Inuussutissarsiutigalugu piniarnermut allagartap pineqartunut isertitat 50/50 attatiinnarneqarnissaa**
- **Qimussimik ukiuunerani piniartarnermi pisassiisoqartuarnissaa anguniarparput -tuttut, umimmaat eqqarsaatigalugit**
- **Nakkutilliisoqarnerup nukittorsarneqarnissaa, pingaartumik avannaa Uummannaq Upernavillu eqqarsaatigalugit.**

Ilisimavarput tusarniaanerit piffissami December 2020-imit 15 Januar 2021-mut pisimasut tassanngalu akissuteqaatigineqartut soorunami siammasissumik ataatsimiititaliami sukumiisumik eqqartorneqarsimallutik, ilaatigut iluarisimaakkatsinnik Kulturikkut periusitoqqat eqqarsaatigalugit Tasiilami eqqaanilu immikkoortortaqrarfiit oqarasuaatikkut pissarsiffiusumik ataatsimeeqatigineqarput, taamatullu pisoqarnera nuannaarutigaarput siunissamilu piffinnut allanut suliniuteqarnermi atorneqarsinnaalluartut nalilerlutigu.

Piniarsinnaanermut allagartaqalernissaaq eqqarsaatigalugu ukiut killigititaasut ajorinngilagut, taamatuttaarlu pingaartillugu oqaloqataaffiginikuusarput tassaavoq kulturitoqqatta arlaagut attatiinnarneqarnissaata pingaaruteqassusaa soorlu piniarnermik allagartallit pernatitsisinnaanerisa ersarissumik allaqqasumik ilanngunneqarnissaa. Tamanna siammasissumik isumaqataaffigineqarmat ataatsimiititaliaq paasinnilluarsimasoq oqaatigisinnaavarput.

Pingaartilluguttaaq eqqaasinnaavarput qimussimik ukiuunerani tuttunik Umimmannillu piniartoqartarnissaa periarfissiisutigineqartassasoq oqaloqataaffigisimagatsigu, ilisimagatsigu tamanna neqissaqarnikkut annertuumik inuiaqatigiinni iluaquusiisartoq, taamaattumillu attatiinnarneqartariaqartoq ersarissumik isumaqarfigigatsigu.



Taamatuttaa q iluarisimaarparput inatsisissami kaammattuutigineqarmat Kulturikkut pisassiissutit piulissasut, tassa Qimussimik, Qaannamillu piniariaatsit kingornutat, kulturitoqqatta attatiinnarneqarnissaanut pingaaruteqartorujussuit ingerlaqqittuarnissaat piulissamat tamanna nuannaarutigalugu oqaatigissagatsigu.

Naggataatigut Siumumiit ataatsimiititaliami sulinitsinni pitsaasumik suleqatigiinnermut qujarusuppunga, malugigatsigu isummatta qaqittarneranni tunngaviusumik tusaaniarneqartarsimanagerput, aammalu ataasiarata suliaq Gruppitsinnut nassaqqaarusuttarsimavarput taamatullu piumasaqartarnitsinni paasinnineq piusarmat qujaqqippunga.

Tassa suliaq pingaaruteqaqimmat sapinngisamik tunuliaqutaanissarput isummatsinnut tulluartsuussasoq siunertaajuarsimavoq, isumaqarpungalu inatsisissap suliarineqarnera tamaat eqqarsaatigalugu tamanna iluarisimaarinninnermik oqaasertalersinnaallugu.

Taamatut oqaaseqarlunga Siumuminngaanniik imm 170-mut akuersilluta taasinissarput oqaatigissuara.

Jens Kristian Therkelsen Siumut